

"Mi a dicidi cu e mihor decision ta pa entrega mi asiento bek como parlamentario y pone na disposicion di partido MEP"

By **Redaccion 36** - July 9, 2019



- Advertisement -

Sue-Ann Ras:

ORANJESTAD (AAN): Den mensahe hopi emocional, Sue-Ann Ras a anuncia cu e ta entrega su retiro como Parlamentario, relaciona cu loke e mes ta categoriza como un 'incidente fastioso y hopi bergonsoso', cu a tuma lugar durante cumbre di delegadonan di IPKO den Eerste Kamer na Den Haag, na unda periodistanan di e canal publico di TV na Hulanda, NTR a filma e Parlamentario di Aruba, sinta durante discurso di diferente politico, cu un tablet computer riba su mesa, y ta mirando un TV Serie usando e plataforma di Netflix.

Loke a pasa aki a crea un ola di disgusto tur caminda, incluyendo demas miembronan di IPKO di Hulanda y Corsow cu tabata den e reunion.

Den su mensahe, Ras ta cuminsa na bisa cu "den bida nan ta bisa cu Dios ta pone situacionnan bo dilanti y ta wak con ta atende cu nan. E ta test bo fe, bo perseverancia y bo

determinacion. Y mas cu tur cos bo caracter. Y recientemente esey tabata e caso cumi tambe."

Su palabranan ta sigui como lo siguiente: "Pa aworaki e incidente famoso cu a sosode cu mi na Hulanda, tabata uno fastioso y hopi bergonsoso y cu a crea un momento sumamente incomodo, no solamente pami, sino mi famia, como tambe pa partido. Y mas leu ainda, esnan cu ta conta y a pone nan confiansa den mi, esta mi sostenedornan. Yam'e con cu bo kier, pero e tabata un acto y decision di mi, cu mi no ta bay hustifica y cu a hinca mi den un situacion asina.

Mi a haci algo sin pensa y awo mi tin cu carga e consecuencianan y mi responsabilidad. Pa esaki mi ta pidi mi mas sincero despensa y di curason. Bida a siñami un biaha mas cu loke bo construi positivamente den un periodo largo, un carera hoben den politica, por keda destrui cu un solo acto di apenas algun di minuut.

E comentarionan, danki na mundo moderno, a plama hopi lihe. Pero atrobe, mi ta compronde. Mi tin cu biba cu esey y mi sa cu mi a comete un eror barbaro. Mi sa cu mi no lo drecha e fayó cometi y cu cada ken sa con, kico y dicon ta condena mi. Loke ami si por bisa awor ta, cu spera cu mi eror por sirbi como un wake up call pa tur hende y tambe sirbi como un norma di con un hende den e funcion aki tin cu actua den futuro ora cu e comete un fayó.

Pa con chikito cu e por ta, te na esun mas grandi. Esaki sigur no ta e manera cu mi a visualisa mi carera politico cortico di finalisa. Pero e eror aki ta recordami tambe cu no ta tur cos ta bay manera mi lo desea pa e bay. Y p'esey, despues di a consulta primeramente cu mi mes, despues cu mi famia y partido, mi a dicidi cu e mihor decision ta pa entrega mi asiento bek como parlamentario y pone na disposicion di partido MEP.

Mi sa cu mi no a comete nada ilegal. Mi no a horta y como tal, mi mester por hala esaki un banda y sigui p'adilanti. Sinembargo ami no lo ta comodo cu esey mas. Mi ta spera un biaha mas cu esnan cu mi haci dolor, rabia of a decepciona cu e acto irresponsabel aki, por pordonami.

Esey ta bay pa mi famia, mi partido y mi siguidornan. Tene esaki bon cla si. Mi por ta retirando di politica, pero mi lo sigui vigila y unda cu por, sigui aporta cu mi granito di arena, sigur pa mehoracion di enseñansa y tambe social.

Lastimamente mi no a logra caba tur mi trabaonan den Parlamento, pero lo haci tur mi intento pa sigui di pafo.

Y finalmente mi kier a pidi tur pa respeta mi decision, respeta mi privacidad y compronde cu mi lo kier lag'e te aki y cera e capitulo aki.

Pa cualkier pregunta, mi ta dirigi boso na partido. Masha danki pa boso atencion y un feliz dia yen di bendicion."

Apesar cu e tabatin menos di 2 aña ta fungi como parlamentario, Ras a bringa hopi pa un mihor cambionan den enseñanza, idioma Papiamento y derechonan di mucha.

- Advertisement -

Redaccion 36
